

官常典第一百二十二卷

聖裔部藝文一

制命宗聖侯孔羨奉家祀碑

魏曹植

維黃初元年大魏受命嗣軒轅之高蹤紹虞氏之遐統應曆數以改物揚仁風以作教於是輯五瑞班宗彝鈞衡石同度量秩羣祀於無文順天時以布化既乃緝熙聖緒紹顯上世追存三代之禮兼紹宣尼之後以魯縣百戶命孔子二十一世孫議郎孔羨爲宗聖侯以奉孔子之祀制詔三公曰昔仲尼負大聖之才懷帝王之器當衰周之末而無受命之運在魯衛之朝教化洙泗之上栖栖焉皇皇焉欲屈己以存道貶身以救世於是王公終莫能用之乃退考五代之禮修素王之事因魯史而制春秋就太師而正雅頌俾千載之後莫不宗其文以述作仰其聖以謀咨可謂命世大聖億載之師表者也遭天下大亂百祀墮壞舊居之廟毀而不修褒成之後絕而莫繼闕里不聞講誦之聲四時不睹烝嘗之位斯豈所謂崇禮報功盛德必百世祀者哉嗟乎朕甚憫焉其以議郎孔羨爲宗聖侯邑百戶奉孔子之祀令魯郡修起舊廟置百戶卒吏以守衛之又於其外廣爲屋宇以居學者於

是魯之父老諸生遊士睹廟堂之始復觀俎豆之初設嘉聖靈於髣髴想禎祥之來集乃慨然而歎

曰大道衰廢禮樂絕滅三十餘年皇上懷仁聖之懿德兼二儀之化育廣大包於無方淵深淪於不

測故自受命以來天人咸和神氣氤氲嘉瑞踵武休徵屢臻殊俗解編髮而慕義遐夷越險阻而來

賓雖太皞遊龍以君世虞氏儀鳳以臨民伯禹命元圭而爲夏后西伯出岐社而爲周文尙何足稱

於大魏哉若乃紹繼微絕興修廢官疇咨稽古崇配乾坤况神明之所福作宇宙之所觀欣欣之色

豈徒魯邦而已哉爾乃感殷人路寢之義嘉先民泮宮之事以爲高宗僖公蓋嗣世之王諸侯之國

耳猶著德於三頌騰聲於千載况今聖皇肇造區夏創業垂統受命之日曾未下輿而褒美大聖隆

化如此能無頌乎乃作頌曰煌煌大魏受命溥將繼體黃唐包夏含商降釐下土廓清三光羣祀咸

秩靡事不綱嘉彼元聖有赫其靈遭世替亂莫顯其榮褒成既絕寢廟斯傾闕里蕭條靡韶靡馨我

皇悼之尋其世武乃建宗聖以紹厥後修復舊堂豐其饗宇莘莘學徒爰居爰處王教既新羣小遘

沮魯道以興永作憲矩洪聲豈遐神祇來和休徵雜還瑞我邦家內光區域外被荒遐殊方慕義搏

拊揚歌於赫四聖運世應期仲尼旣沒文亦在茲彬彬我后越而五之垂於億載如山之基

至和二年改封文宣公爲衍聖公制

宋仁宗

孔子之後以爵號褒顯世世不絕其來遠矣自漢元帝封爲褒成君以奉其祀至平帝時改爲褒成侯始追謚孔子爲褒成宣尼公褒成其國也宣尼其謚也公侯其爵也後之子孫雖更改不一而不失其義至唐開元中始追謚孔子爲文宣而尊以王爵其嗣褒聖侯爲嗣文宣公孔子子孫去國名而襲謚號禮之失也蓋由於此比朕稽考前訓博采羣議皆謂宜去漢之舊革唐之失稽古正名於義爲得朕念先帝崇尚儒術親祀闕里而始加至聖之號務極尊顯之意肆朕纂臨繼奉先志不敢失墜而正其後裔嗣襲之號不其重歟宜改至聖文宣王四十六代孫宗愿爲衍聖公

上孔中丞書

石介

夫子之道不行於當年傳於其家直四十餘世以俟子孫如此其遠也夫子沒後世有子思焉安國焉穎達焉止於發揚其言而已自漢相光唐相緯雖得位亦不能盡行其道夫子之道其肯鬱然蟠伏於其家乃躍起奮出瀾漫於天下天下人皆可以得之漢高祖唐太宗能得之於上以之有天下三百年孟軻揚雄文中子韓愈能得之於下以之有其名於億萬世唯孔氏子孫無有得之者俟四

十餘世僅二千年閣下乃得之今夫子之道不專在於閣下也閣下又且赫然有聲烈於天下復得位於朝見用於天下其將以夫子之道事於聖君施於天下俾國家爲二帝爲三王爲兩漢爲鉅唐矣夫子之志曰吾志在春秋春秋天子之事也世衰道微邪說暴行又作臣弑其君者有之子弑其父者有之夫子懼之而又時無君已無位不能誅不能正乃作春秋焉所以正王綱舉王法故春秋成亂臣賊子懼爲司寇則七日而誅少正卯於兩觀之下攝相事則齊終不敢窺兵河南當時之君則昏也當時之位則攝也尙不及閣下得明君有大位爲中丞逾月而未聞有舉焉閣下在朝廷尙有奸臣敢在位天下蠹賊未悉除是夫子道猶未克盡舉豈夫子直四十餘世僅二千年以俟閣下閣下宜念之且天子之設御史府尊其位崇其任不與他府並舊有大夫則中丞亞大夫而領其屬今大夫闕則中丞其長也故中丞之任特重焉中丞之責尤重焉君有佚豫失德悖亂無道荒政拂諫廢忠慢賢御史府得以諫責之相有依違順旨蔽上罔下貪寵忘諫專福作威御史府得以糾繩之將有驕悍不順恃武肆害玩兵棄戰暴刑毒民御史府得以舉劾之君至尊也相與將至貴也且得諫責糾劾之餘可知也御史府之尊嚴也如軒陛之下廟堂之上進退百官行政教出號令明

制度紀賞罰有不如法者御史得言之御史府視中書樞密雖若卑中書樞密亦不敢與御史府抗
威爭禮而反畏悚而尊事之御史府之重其無與比然須得如閣下者居之始貴矣易曰苟非其人
道不虛行禮曰人存則政舉閣下聖人之後又能得聖人之道以方重剛正公忠清直烈烈在朝爲
天子獻可替否贊謀猷持綱紀天下想望其風采者十五年間簡於清衷期將大用且歷試於外更
觀其能違更三大藩皆卓然有治聲聞於天府浹於日下御史府中丞虛位日久紫宸殿下佩金煌
煌行聲鏘鏘且有百數天子弗錄之乃南走三百里外以驛召閣下直入其府登其位自陛下獨決
萬幾來登崇俊良黜逐纖人革故鼎新百度修舉太平之望日月以隆然而天人之心猶鬱然不大
舒釋者以閣下尙稽大任也至是天人之心始大舒釋矣閣下自初及終皆以直道進詩曰靡不有
初鮮克有終介嘗聞朝大夫語曰有某人爲某官時忠鯁直讜謇謇敢言觸龍逆鱗不避誅死由是
人主知之聲名藹然聳動朝野不四五年取顯仕今爲某官位彌高身彌貴祿厚惠渥私庭曳青綬
者五六人門前炎炎可炙手顧此勢力榮寵有所惜也如有物塞其耳如有葉蔽其目如有鉗緘其
口朝廷有闕政國家遺事若不聞若不睹而不復言則向之忠鯁讜謇謇敢言乃沽名耳其以爲

速進之媒乎意士之積道德富仁義於厥身蓋假於權位以布諸行事利於天下也豈有屑屑然謀夫衣食者歟正色直己立於朝廷行其道乃使天下有此論庸無傷乎古今君子少小人多君子常不勝小人人不惟常勝君子而又不能容之惡直醜正囂囂實繁幸而有一君子在於朝則百小人排之非鐵心石腸剛正不折未有不隨而靡者小人不容君子也如是而不能死節以永終譽中途晚節須有淪變宜其爲小人之所排也今有人位未顯身在下能堅正不顧其身敢直言極諫犯天子顏色封章抗疏論天下利害羣小人必叢立指點曰此人速進也沽虛名也非以行道也吁吾徒不見容於小人也取信於天下也固若是乎學周公孔子之道不用則卷而懷之用則肯已乎實將施及國家布於天下以左右吾君綏吾民矣羣小人排毀不已無足怪也閣下亦當大警戒之勿使天下有所論則君子幸甚天下幸甚

五賢堂記

孔道輔

五星所以緯天五岳所以鎮地五賢所以輔聖萬象雖列非五星之運不能成歲功衆山雖廣非五嶽之大不能成厚德諸子雖博非五賢之文不能成正道由是三才之理具萬物之情得故聖人與

天地並高卑設位道在其中矣所以尊君德安國紀治天物立人極皆斯道也然天地有否閉日月有薄蝕聖人之道有屯塞若天地否則聖人建大中之道以開泰之聖人之道壅則五賢迭起而輔導之先聖生當戰伐之世法令機祥巫祝之弊享楊墨之迂誕莊列之詭譎窮聖汨常三騶孫田術勝於時則我聖人大道爲異端破之不容於世也而孟荀繼作乃述唐虞之業序仁義道德之源俾諸子變怪不軌之勢息聖人之教復振其功甚大矣後至漢室圯缺揚子惡諸子之外詆訾聖人獨能懷二聖三王之迹譏時著書以尊大聖使古道昭昭不泯者揚之力也西漢之後皇綱弛紊六代喪亂文章散靡妖狂之風蕩然無革文中子澄其源兆興王之運韓文公治其末廣尊道之旨致聖化益光顯夷夏歸正道雖諸子譏諛或欲攘其法戕其教蔡其途蕪其說弗可得已然賢者違世矯俗能去難者蓋寡矣孟不免齊梁之困臧倉之毀荀不免齊人之讒楚國之廢揚不免劉歆之侮投閣之患王不免隋氏之抑羣公之沮韓不免潮陽之竄皇甫之譖其間或譏其作經或短其修史彼徒能毀之弗顧己之弗逮也達者以爵位爲虛器太過者人猶嫉之況抱道德富仁義立終古之名寧無惡乎天地雖否無傷於體日月雖蝕無傷於明聖賢雖困無損於道得其時則堯舜禹湯之爲

古今圖書集成
君臯陶伊呂之爲臣功濟於當世非其時則孔聖之無位五賢之不過道行於後世亦猶歲旱則澤益甘夕暗則燭益明世亂則賢者益固歷代以斯爲難也孔聖之道否則五賢振起之今五賢湮蔽振之者無聞焉道輔學不及前哲幸以事親守故國爲儒者榮嘗謂伏生之徒以訓傳之功像設於祖堂西序而五賢立言排邪說翊大道非諸子所能跂及反不及配缺孰甚焉因建堂收五賢所著事圖其儀叙先儒之時薦庶幾識者登斯堂觀是像覽是書肅然革容知聖賢之道盡在是矣

贈正奉大夫襲封衍聖公孔憲墓表

金堯懷英

至聖文宣王五十代孫諱憲字元會曾祖諱若蒙襲封奉聖公贈朝奉郎伯祖諱端友朝奉郎直祕閣襲封衍聖公宋建炎二年冬祀大禮赴揚州陪位值大兵隔絕以其弟端操之子璠襲封璠長子拯皇統二年三月補文林郎襲封衍聖公無嗣其弟憲大定三年七月補文林郎襲封衍聖公管勾先聖祀事公三歲而孤幼穉警悟及長力學自強通春秋左氏尤喜韓愈詩文談論簡尺多引二書先輩每稱譽之公職在嚴奉林廟草木諸人無敢輒犯宗族之間少長有禮人敬其勤畏而愛之一日顧瞻鄆國夫人殿嘿自責曰生爲人子孫而謬當其職使之隘陋如此寧不媿於心乎乃親率佃

戶攜斧斤入蒙山躬親指畫採伐中椽桷者旬有餘日連車接軫以歸起西廟尼山兩處鄆國夫人殿及大中門家廟齋廳祭祀庫計五十餘楹彩飾圖繪畢備朝廷聞公名召赴闕欲留隨朝任用公力辭職專祀事不宜妨職任之不專則特授曲阜縣令未到任歲大旱旣到任甘雨三日而止稼穡益茂歲仍大熟公精勤吏事縣署至所居住返十餘里及晚治縣無一日稍闕差科甚均詞訟無滯親族有訟卽移佐官無少長背向意諸村當首者舊驗物力赴役公預令定奪相次明以公文告示比至其人已自承認交替不復更至庭下每歲夏絹凡丈尺小戶舊合併全疋輸納隨村首目皆自斂掠公止令依市價積算扣買使併起納盡革舊弊縣城摧壞官計工修築公戒董役者曰慎勿拆廬舍壞塚墓若廬舍有礙當隨地築之塚墓有壞當以己俸完之二者旣安吾心亦安矣其有不成葬穴無主暴露枯骨當遣使厚葬之有碑曰叢塚邑人春冬祀之葬畢是夜夢衆人來謝內一人稍前云嗟哉莫之能及旣寤遣人搜求又得十餘副復夢來謝公年四十得數子皆不育一日夜夢異人衣冠偉然告曰今此非爾子後丑年庚月丁日所生眞爾子矣當名元措公儉於奉己厚於賓客周惠困窮不問家之有無娶泗水孫氏宋副樞密孫傳之女孫後封魯郡太夫人又娶泗水侯氏二

古今圖書集成
子長卽元措今襲封衍聖公次元絃舉進士女一人適兗州宣武韓尚公享年五十三終奉直大夫以子貴贈正奉大夫嗚呼孔子之澤及於無窮國家褒崇之恩方自此始又豈止此而已哉

贈中議大夫襲封衍聖公孔治神道碑記

元蔡文淵

朝列大夫濮州尹致政孔思誠以書幣緘父祖二世德業之狀命文淵文於石以著其不墜厥緒之實文淵謹按素王世紀思誠宣聖五十四代孫也公之曾祖諱元用字俊卿當金季政亂播越南遷幾二十餘年時天兵壓境公以林廟爲重乃率孔族暨庶姓以降其大帥太師國王承制封拜以公世襲曲阜縣令公有文武才復拜其子之全仍令其邑授公兵柄攻取益都累有勝捷沒於王事曾祖妣聶氏封宜人婦德爲宗族楷範一子卽之全字工叔金已前襲封公元措來歸同謁武惠嚴侯公因讓曰以賢以長責在吾叔元措乃許曰子父子保全林廟當世其邑武惠允之仍居邑宰二十餘年公先考諱治字世安一字先己孝友仁厚公謹廉明文章政事爲一時稱首弱冠從翰長鹿庵遊同門李孟閻徐恆以斯文相諮議年登二十襲曲阜尹雞鳴而起坐以待旦勤於庶務聲達朝廷其待同僚愛百姓咸盡其道時濟齋楊君師表於魯公退食執弟子禮事之潛齋去損齋楊公繼之

復從遊盡仕優則學之道相下處士任公持正嘉其才德以女妻之其內助居多壽四十一先公卒
贈東平郡君再娶畢氏一子一女皆任氏出子卽朝列公也女適長垣尹張執中封恭人公於二弟
甚相友愛中統四年公始權祀事嚴潔典禮惠睦宗族待炊之家百室之半至元三年公謂權祀之
職匪事功何以塞繼述之責聞於上賜白金五十兩重修啟聖王殿葺書閣剏環廊以石易木殿楹
再新築垣圍廟百堵皆作至元六年罷洒掃戶凡廟庭大祭維豐維潔咸備於己三十餘年給國家
南征之役以才幹聞年五十三告老以男思誠襲替世尹陞公奉訓大夫知單州事將行戒其子曰
無妄怒輕管楚人邑長者如汝之父兄幼者如汝之子弟可不慎乎其知單州也興學校延名士以
成士風時憲府貴公按問有倫有要人自以爲不冤至元二十八年擢公奉直大夫知密州事首勸
儒學三皇廟正彝倫明禮法建醫學濟斯民扶仁壽導江張公洎損齋楊公碑刻悉焉元真改元公
見成宗皇帝於上都時大臣奏至聖文宣王孔夫子之嫡孫其祖元用以軍功沒於王事實開國立
功之臣治權奉祀事三十餘年有德有文可襲封爵上可其奏仍賜坐慰勞甚厚特授中議大夫衍
聖公以祖庭儀等之制飛章於朝賜尙珍署田五十頃復給洒掃戶重修禮殿從公請也作堂私第

名以詩禮示不忘過庭之教也辛泉楊公大書之紫山胡公記焉大德十一年冬十一月九日公薨於私第之正寢享年七秩有二冬十二月望日葬公於宣聖墓西北任氏祔焉濮州尹朝列公由鄉縣以師表國學復授安慶推官尋知息州丁內憂不赴繼拜兗江南湖北道肅政廉訪司事以朝列大夫濮州尹致仕公之所處皆有能名其忠孝廉勤皆先公教誨之力也公娶翰林應奉任君之女振文處士公子也再娶畢氏牛氏馮氏封魯郡君孫男三人長曰克欽牛氏出授從仕郎承襲世尹權奉祀事娶東野嘉議公女孫女孫五長適廣東廉使楊倬次適本縣儒士呂恪次適蘄州路府判馬侃子元魯次適主泗水簿馬克仁次適禮部尙書李庭寔孫士良其子孫端潔繩螯如此我公德業益茂矣文淵謹考世紀自子思子敘正傳漢唐以下安國穎達而已我朝隆盛天生數公者赫然聲烈著於兩間保林廟以佑鄉民好學不倦以承道統力陳大義以新廟庭近能迂續累世之忠孝遠能銘述先聖之心法以欽承有國右文之典故爲之銘昭示後世彰我聖人溥嗣之恩渥於無極云銘曰天生夫子師表百王慶流萬古奕業隆昌天朝受命休有烈光素王之裔帝錫純良扶文拱武以保魯疆象賢世邑以死勤王猗歟乃祖公爵是承孝思惟則天子來寧嗟若先考聿新聖宮濟

人利物以孝移忠繼述祖道朝覲帝容帝若曰咨汝襲祖封賜田復戶命爵上公又宣之澤萬類含春永遵心蹟拱視北辰天清地肅正我彝倫續茲譜牒以貽後人

故襲封衍聖公贈中奉大夫河南江北等處行中書省叅知政事護軍追封魯郡公諡文肅孔

思晦神道碑

危素

公諱思晦字明道孔子五十四世孫也曾祖元孝祖之厚贈亞中大夫濟寧路總管輕車都尉魯郡侯父浣贈通議大夫禮部尙書上輕車都尉魯郡侯母李氏追封魯郡夫人公生至元四年七月天姿穎秀總角讀書已識大義導江張先生頴爲三氏教授公授業焉講求義理薄詞章尊德行家貧躬耕雖劇寒暑不懈於學先生深器重之甫年十有七禮部公棄世喪葬以禮奉母以孝聞大德七年遊京師國子祭酒耶律公有尙謀薦辟之以親老固辭至大元年太夫人臥病躬進藥餌衣不解帶及居喪勺水不入口者五日三年喪畢三氏教授舉茂才授范縣儒學教諭延佑二年調寧陽學先是兩邑校官率以廩薄不能受職公儉約自將教養有法比代皆輓留不忍舍三年族人合議以公嫡長且賢宜襲封爵主祀事上政府未決平章政事李韓公偕禮部力主之會仁宗皇帝問孔子

之裔迨今幾世襲封爲誰李公具以對仁宗親閱譜曰以嫡應襲者思晦也復奚疑且以前襲封秩卑俸薄遂授中議大夫襲封衍聖公月俸自百緡加至五百緡鑄印四品泰定三年山東廉訪副使王鵬南言襲封上公而秩正四品於格弗稱且失尊崇意明年陞嘉議大夫至順三年改鑄三品印公自以宗祀責重恆懼弗稱蒞事之際必敬且慎初廟燬於兵後雖苟全而樓角圍牆未備乃竭力營度卒復舊規金絲堂壞儲時祀餘費葺新之不足補以己俸繪飾從祀塑像補完祭器禮服請於中書置江南郡縣書籍尼山毓聖之地廟毀而碑存居民冒耕祭田且百年矣稽諸典故言於部使者命鄒縣長沐陽令往覈之復田百五十畝歲入粟四十有八石因請置尼山書院三氏學田三千畝在沛縣之刁陽爲豪民所據檄州與沛縣歸侵疆州官受贓敗其事公往復辯議再歲克定前代封聖父齊國母魯國公言於朝宣聖封王而父爵猶公願加褒崇有旨加聖父啟聖王母王夫人公府初止設掌書一人書籍音樂無司之者金穀無任出納者以是爲言遂置典籍司樂管勾凡三人分掌之祿秩視國子監且給管勾印掌書祿視寺監五季時孔永之後方盛欲以僞滅眞乘亂害宣聖子孫幾盡其後欲冒稱公以爲不早辨則眞僞久益莫究彼於我不共戴天乃共拜殿庭而列於

族可乎遂會族人稽典故斥絕之家譜石刻既燬因參究詳考廣記諸書重刻焉元統元年寢疾閏月乙巳薨於寢異香滿室羣鶴百餘翔於上又見神光自東南隕於舍北云己酉葬祖塋西二百步娶張氏封魯郡夫人子男一人克堅爵嘉議大夫襲封衍聖公女四人適李德明孫大用喬元善馬元用孫男九人希學嗣爵中奉大夫襲封衍聖公希說希範希進希麟希鳳希順希尹皆國子生希贊其季也孫女二人曾孫男五人女四人公端重簡默動容不苟嗜學誨人本乎真誠於宗族尤隆恩義嘗曰吾蒙祖宗遺澤殊流同源可不念諸或不自給者周之子弟皆籍於學教養不怠女兄適裴氏而貧迎養甚謹女弟末疾且不慧起居必待於人每親爲頰沐性尙清素疎財好義所居就襲封舊廡不改作終不構私室其薨也家無尺寸之遺公暮年多疾未嘗廢書作字端楷可法故三子子孫與凡四方受業仕而有聞於時者多公造就薨之日莫不哀之會葬者以千計後十有七年贈中奉大夫河南江北等處行中書省叅知政事護軍追封魯郡公諡文肅克堅以江浙行省左右丞汪公澤民守兖州時所述行狀屬林廟學正夏以忠來俾素論撰先德篆銘神道之碑素不敢以固陋辭則序而爲之銘銘曰微子之引篤生聖師歷聘侯國式扶民彝維文肅公五十四世克昌其家

宏廓震厲導江張氏學探本源授業三氏遊道之園有繁羣經出自屋壁芟闢蕪辭毋俾藝壑濮有
范縣竟之寧陽教行下邑絃誦琅琅瞻茲大宗猶秉周禮襲封上公明斷天啟超進華秩匪公之榮
右文貴德天下化成公在魯邦士有標準胡不遐齡耆碩斯隕繫子洎孫丕承寵光節惠易名錫命
焯煌爰述始終刻名闕里與國咸休宜受多祉

故國子祭酒孔克堅墓誌銘

明宋濂

公諱克堅字環夫世家魯之曲阜孔子五十五代孫也曾祖曰之厚贈濟寧路總管輕車都尉祖曰
浣累贈通議大夫禮部尙書上輕車都尉皆追封魯郡侯父曰思晦嘉議大夫襲封衍聖公累贈通
奉大夫河南江北等處行中書省叅知政事護軍追封魯郡公諡文肅曾祖妣女眞氏祖妣李氏妣
張氏皆追封魯郡夫人公少廓達通敏日誦千餘言學極博精尤善春秋左氏傳文肅公薨襲封衍
聖公元重紀至元之年上疏請修飾廟像順帝可其奏賜山東曆日錢之半給其費命監察御史族
人思立持楮幣二萬五千緡勒石以紀成績至正六年中書謂公爵與階不稱奏陞之制授中奉大
夫賜二品銀章十五年平章政事達世帖木兒薦公明習禮學徵爲同知太常禮儀院事以子希學